

E bin mès djins,

Dji n' sé nin vos-ôtes, mins mi, i m' chone qui l'anéye a passé co pus rade qui l' vint d' bije !

Vo-nos-î r'-la, al taye aus fréjes ! On momint qu' tot l' monde ratind. C'èst qu'i-gn-a lès diplomes, parèt ! Mins véci, vos savoz bin qu' c'èst come al sicole dès fans, don, tot l' monde a gagnî. Et minme si tot l' monde n'âre nin s' diplome, tot l' monde âre s' papî.

Mins, si tot l' monde ratind ç' momint-ci – èt dji vou bin wadjî qu' ci n'èst nin tant po l' papî qui po s' ralètchî – dji pinse qui tot l' monde va yèsse one miète anoyeûs. C'èst qu' nos-alans d'vu d'mèrer quate mwès au long sins nos r'veûy. Quate mwès qui nos vont quétefiye choner pus longs qu' nos yût mwès di scole. Pace qu'on s'î plaît bin, parèt, è nosse sicole ! Li boune preûve, c'èst qu' lès cinquante djins qui s'ont inscrît au c'mincemint d' l'anéye, î ont quausu d'mèrer jusqu'au coron.

Gn-a qu' vègnenut véci po l' quinzyinme anéye di rote ! Siya, siya, djè l's-a conu tot p'tits...

Cite anéye-ci, gn-a pont d' mayeûr èt co pont di scabin po vos r'mète lès bistokes. Il avin' mia à fé. Tant pîre por zèls ! Nos-aurans ça d'pus po nos-ôtes bwêre èt mougî.

Çu qu'èst damadje, c'èst qu'i n' vwèront nin qu' nosse sicole si pwate bin. C'èst bin sûr grâce à nos maïsses qui djè l'zeû vôleu bin dire on fèl merci. À nosse Pôl qu'a si bin l' toûr po fé fé dèl jimmastique è walon en minme tims qu' dèl conjugaïson : lèvez vosse keûde – bachîz vosse keûde – rilèvez vosse keûde – ribachîz vosse keûde – ralèvez vosse keûde, rabachî vosse keûde. Il aprind èto tos lès mots d' vocabulaïre qu'i-gn-a dandjî : one botèye – on vêre – do fèl, do doûs, do spitant èt vos 'nn'aurôz ! On fèl merci à Anne-Marie èto. Lèye, c'èst dèl cûjène qu'èle fait è walon : dès gougouyes, on wastia, dès lètcherîyes, dès sucrâdes. Mins gn-a nin qu' ça, don ! Elle èst d' mèstî, nosse comére avou sès lèçons todi apontîyes au père dès pôces avou dès crôyes di totes lès coleûrs po mia fé comprinde lès rûjes dèl grammaïre èt dès conjugaïsons. Èt mon nosse Chantal, pont d'abwêre èt co pont d'amougî. Mins vèyanmint qu'èle n'èst nin là, dji n'è va nin causer. Ci n'èst nin bia d' causer su l' dos dès djins ! Minme si, maugré qu'on n'î fait jamaïs toubac', gn-a tot l' minme quatôze djins à-z-awè chû l' trwèzyinme module. Do jamaïs vèyu !

On fèl merci aus maïsses mins on fèl merci èto aus-èlèves pace qui si vos n' sèrîz nin là, mès djins, nos n'î sèrin' nin non pus. C'èst vos-ôtes qui fait l' réputâcion dèl sicole. C'èst vos-ôtes qu'è cause laudje èt long èt-z-amwinrner vos camarâdes. C'èst vos-ôtes qui fait qu' nos-avans l' dâr, nos-ôtes lès maïsses, di v'lu fé nos lèçons al lècion po qu' vos vos-î plaïjoche bin è nosse sicole. C'èst vos-ôtes qui nos-ècoradje.

D'ayeûrs nos nos rafians d'dja d' vos r'veûy tortos au mwès d'octôbe. Mins tot ratindant, ni rovioz nin qu' dins l' mot lingadje, gn-a l' mot linwe, çu qui vout dire qu'on lingadje èst fait po yèsse causé. On lingadje qu'on n' s'è sièt pus, c'è-st-on lingadje pièrdu. Èt vos m' dîroz qu'i n' faut nin tot l' minme causer d' trop pace qui vos ratindoz après lès r'lètcherîyes qu' vos nos-avoz amwinrné. Vos-avoz raïson, d'ayeûrs, dji n'a pupont d' ratchon. Dji m' va lèyî l' parole à vos maïsses qui vont awè l' plaïji d' vos bistoker.

30/05/2013